

De erst werdd geschennt

Vorsch Woch habb ichs Kättche vor de Stadthall getroffe. Ei gude, habb ich gesacht, wie dann, Kättche, willsde om helle Noochmiddaach schunn in die Stadthall zum Kaf-feedrinke?

Naa, hottse merr zur Antwort gewwe, ich geh unne in de Keller, doo gibts enn Kurs ferr Selbstverteidichung.

Josses, habb ich gesacht, isses so schlimm bei uns dass aach mir Ältere jetz schunn Jiu Jitsu lerne misse?

Ess Kättche hott gelacht: Naa, dess iss enn Kurs nor ferr Fraue. Weil die sich aach immer mehr geeche ihr eichene Männer wehrn misse. Guck emol, hier habb ich enn Zeddel, doo stehts druff: Wehr' dich in der Machowelt! Auch zu Hause!

No ja, Kättche, habb ich gemoont, du musst dich doch nit geeche de Schorsch wehrn, der dut derr doch nix.

No ja, sächst Kättche, ich habb mich halt oogemeld unn jetz mach ichs aach. Heit iss de ersde Daach, doo kann ich emol enoi schnupfern, unn wenn merrs nit gefällt, geh ich halt nimmi hie.

Als ichs Kättche e paar Daach später widder gesehe habb, habb ich se gefroocht wies war bei de Selbstverteidichung.

Die hott mich uff moi Frooch hie gonz onnerst oogeguckt als sunnst unn sacht: Gut wars, ich geh moie widder hie. Mir Fraue misse uns wehrn!

Ach Kättche, habb ich gesacht, mich brauchdsde nit so oogriffslusdisch oozegucke, aach ich du derr nix. Awwer was habbder dann om ersde Daach gemacht?

Sie hott gegrinst: Mir hawwe gonz langsam oofonge, weil de erst werdd geschennt.

Ich habb gonz dumm geguckt: Geschennt? Erzähl merr doch e bisje was defoo.

Ess Kättche hott uff die Kercheuhr geguckt: Eichtlich habb ich joo koo Zeit, awwer weil du's bist, Honnes. Bass uff: Bei de Selbstverteidichung mussde noch vor de Händ unn de Fieß doin Mund beweече. Also saache merr emol dehoom: Wenn de Monn widder emol nit macht wasser gesacht kriecht hott. Odder wanner Widderwort odder iwwerhaupt koo Antwort gibt. Doo muss merr mett de Verteidichung oofonge, indem merr sofort offensiv werdd unn gleich oofängt ze schenne: Du ahler Simbel, du Dollbohrer, du Dabbes, du Honnebombel, Duddeler, Knallkopp, Gaddezwersch, du daab Schinnoos ...

Halt, habb ich gerufe, so konnsde doch nit mettem Schorsch umgeh!

Dess Kättche hot sich nit bremse losse: Unn wanner dann immer noch nit macht was-merr sacht muss merr lauter wern: Du Daachdieb, du Griegeel, du Lumpesack, Nachteul, Hoseblooser, Iwwerzwersch, du umgewender Säustallsposte, du ...

Ich war gonz erschrocke: Josses naa, Kättche, du host joo e Maul wie e Schlachtschwert. Unn sowas lernsde in so emm Kurs? Awwer saach emol - wie schenndsde dann erst mettem Schorsch, wanner eierne blonde Nochbern scheene Aache mache det?

Ess Kättche hott gonz ruhich geantwort: Ei Honnes, doo det ich doch nit schenne.

Ich muss gonz bleed geguckt hawwe: Nit? Doo desde nit schenne?

Emm Kättche soi Aache hawwe schunn widder gefunkelt: Naa, doo det ich doch nit schenne – doo det ich dem gleich ins Gnick haache wie emm Stallhas!

Eiern Honnes